



Diangkat sebagai pemimpin bukan kerja senang, bukan populariti yang dicari, juga bukan nama yang diidamkan. Semuanya dilakukan demi amanah dan tanggungjawab untuk kebajikan bersama.

Memikul amanah lebih kurang 11,000 mahasiswa dan mahasiswi adalah tugas penting setelah diangkat sebagai Yang Dipertua Majlis Perwakilan Pelajar (YDP) sesi 2014/2015. Abdul Muiz Abdul Hakim, adalah mahasiswa dari Universiti Sains Islam Malaysia (Usim) yang menjadi personaliti minggu ini mengisi ruangan *Student Aktivis*.

Muiz jadi pilihan pelajar Usim

Memiliki keterampilan mudah didekati, ditambah pula dengan sikap ramah, Abdul Muiz yang selesa membahaskan dirinya Muiz tidak pernah terfikir menerima watak ini.

Kepercayaan yang disandarkan kepada dirinya bukan datang daripada dirinya sendiri, tetapi kerjasama rakan sepasukan yang kuat membantu.

Akuinya, membincangkan soal peranan, ia tidak ada beza daripada kalangan pemimpin terdahulu. Peranan pemimpin yang digalas menuntut dirinya sentiasa berpandangan jauh, selaras misi membina akal dan jiwa.

Mahasiswa anak kelahiran Simpang Pulau, Perak ini berkata perantaraan ini adalah pengalaman cukup bernilai. Siapa sangka dalam usia 21 tahun, memikul amanah universiti dan mewakili suara mahasiswa lain untuk kebajikan dan kemakmuran.

BUKAN KERJA MUDAH

"Kejayaan kepimpinan ini juga adalah melalui sokongan padu, rakan taulan dan semangat yang juga ditunjukkan Timbalan Yang Dipertua, Nurul Atikah Mohammed Shaii dan rakan-rakan sepasukan lain," katanya.

Berkongsi perihal dirinya dalam politik kampus, Muiz berkata, kampus adalah medan terbaik untuk menonjolkan kebolehan, namun ditambah pula sahsiah terpuji dia mudah disenangi, baik rakan sejawat mahupun kalangan siswa siswi.



Latih diri jadi pemimpin sebenar



Muiz (empat, kanan) bersama rakan-rakan yang juga terlibat dalam aktiviti sukarelawan.

"Kebajikan adalah asas utama yang semua orang akan gunakan dalam berkempen, jadi tidak cukup dengan hanya manifesto, saya akan terus mendekati golongan sasaran dan meninjau sejauh mana permasalahan mereka.

"YDP dijadikan tempat mengadu, ada yang datang meluahkan rasa susah dan kami sedaya upaya membantu mengikut garis-garis yang ditetapkan lembaga pengurusan," katanya.

Mengakui tugas sebagai penuntut Sarjana Muda Syariah Fiqh dan Fatwa juga menuntut tanggungjawab tinggi, dia berkata, pengurusan masa yang efisien menjadikan dirinya lebih berdisiplin.

"Penglibatan saya dalam politik kampus tidak mengganggu tugas kuliah mahupun tugas khas bersama pensyarah, malah saya berasa lebih seronok, sekurang-kurangnya masa saya diisi dengan perkara berfaedah.

"Ia juga melatih saya untuk lebih menghargai masa serta sebagai pelapis untuk menjadi pemimpin masa depan," katanya.

Menyusuri latar belakangnya, penuntut tahun akhir ini juga seorang yang aktif. Sebelum dipilih sebagai YDP dia menjawat beberapa jawatan penting dalam persatuan, universiti dan kampus tersendiri.

"Saya terlibat sebagai Exco Pendakwah dan Hubangan Luar dan baru sebulan diberi kepercayaan sebagai sekretariat Pendakwah Muda Malaysia. Tugas-tugas seperti ini begitu membantu cara kita berdepan dengan pelajar, menyelesaikan masalah dan berfikir terbuka dalam menerima aduan dan menuntut kesabaran yang tinggi," katanya.

LATIH DIRI DENGAN KEPIMPINAN
Seperti memilih pemimpin negara,

begitu juga proses pemilihan pemimpin universiti. Hak kebebasan yang ada di tangan mahasiswa dan mahasiswi begitu diperlukan dalam memilih pemimpin.

Ketika sesi pemilihan baru-baru ini, Muiz menjelaskan, semuanya berjalan lancar seperti yang diharapkan. Tiada provokasi mahupun kejadian luar kawalan berlaku.

"Proses pemilihan baru-baru ini disempurnakan dengan adil dan telus, pengalaman berkempen juga menjadikan saya lebih profesional dalam berdepan dengan penuntut-penuntut yang lain. Kerjasama yang baik daripada semua pihak, begitu bermakna dalam melancarkan proses pemilihan.

"Kami berkempen juga bersama-sama, paling penting kami membawa agenda untuk kesenangan dan kesejahteraan bersama," katanya.



ABDUL
MUIZ
ABDUL
HAKIM



Turun padang untuk berkempen dan bertemu rakan-rakan siswa dan siswi.